

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaannut siulittaasup Lars-Emil Johansenip aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 1/2015-imik, Inatsisartut tapersiinissaannik Inatsisartut aalajangiiffigisassaattut siunnersuut:

**Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalackersuisunut kaammattuutigaa suleqatigiissitamik susassaqtartunik attuumassutilinnik inuttalimmik pilersitseqqullugit, taassumalu suliassarissagaa nunat pineqartut pingasut killeqanngitsumik niueqatigiinnissamik isumaqatigiissuteqassappata nunanilu avannarlerni killerni niuernermit siunnersuisoqatigiinnik pilersitsisoqassappat ataatsimut pissarsiarineqarsinnaasut nalunaarsornissaat. Suleqatigiissitamut suliassarititat minnerpaamik ukuningga ilaqassaput:**

- **Nunani avannarlerni killerni killeqanngitsumik niueqateqarsinnaanermut isumaqatigiissuteqarnerup, imaluunniit nunat marluk akornanni, soorlu nunatta Islandillu aamma nunatta Savalimmillu akornanni, isumaqatigiissuteqarnerit iluaqutigisinnaasai ajoqutigisinnaasaalu nalunaarsussallugit.**
- **Killeqanngitsumik niueqateqarsinnaanernikkut nunat sutigut iluaqutissarsinnaanersut sutigullu ajoqutissarsinnaanersut nalunaarsussallugu.**
- **Nioqqutissat, sullissinerit, aningaasat innuttaasullu killeqanngitsumik nikerarsinnaatillugit ataatsimut aningaasaqarniarnikkut suleqatigiiffiortoqarpat tamatuma iluaqutigisinnaasai ajoqutigisinnaasaalu nalunaarsussallugit.**
- **Nunat pingasut akornanni killeqanngitsumik ammasumillu niueqatigiissinnaanermi periarfissat aporfissallu suussusersiniarlugit nunat avannarliit killiit niuernikkut siunnersuisoqatigiiffiannik pilersitsinikkut iluaqutissat ajortutaasinnaasullu nalunaarsussallugit.**

### **Tunngavilersuut**

2007-imiit Nunat Avannarliit Killiit Siunnersuisoqatigiiffiata akuttunngitsumik nunat pingasut, Savalimmiut, Kalaallit Nunaata Islandillu akornanni niueqatigiinnerusinnaaneq suleqatigiinnerusinnaanerlu oqallisigisarpai. Oqallinnerni pineqartarsimapput nunat avannarliit killiit killilersugaanngitsumik niueqatigiissinnaanernik isumaqatigiissuteqarsinnaaneq, aningaasaqarniarnikkut ataatsimut soqutigisaqarfimmik pilersitsinissaq aamma Issittoq eqqarsaatigalugu nunat avannarliit killiit ataatsimut ilioriusissioinnissaat. Siunnersuisoqatigiiffiup sammisaq aalajangersimasunik qulequtaqartitsilluni ataatsimeersuarnerni, ukiumoortumik ataatsimiinnerni, kaammattuutitut aalajangersakkani, kingullermik nr. 2/2012-ikkut, tikittarsimavaa.

Siunnersuisoqatigiiffik isumaqarpoq niueqatigiinnerulerneq iluaqutissarpassuaqartoq nunani tamani iluaqutaasussamik, nunani pingasuni suliassaqartitsinikkut, ineriartortitsinikkut pitsaanerumillu aningaasaqarniarnikkut. Isuma tamanna 2015-imi januaarip ulluisa 31-iannit februarip ulluisa aallaqqaataannut Kalaallit Nunaanni Aasianni siunnersuisoqatigiiffiup kingullermik aalajangersimasumik qulequtaqartitsilluni ataatsimeersuartitsinerani – ”Nunat Avannarliit Killiit Issittumi – takorluukkaaniit timitaliinnermut” - naqissuserneqarpoq”.

Ataatsimeersuasrnerup ilaatigut siunertarivaa paasiniassallugu nunat avannarliit killiit Issittoq eqqarsaatigalugu ataatsimut iloriusissaanni suleqatigiissutigineqarsinnaasunik ataatsimut soqutigisaqarnersut ilaatigut apeqqutit uku akissutissarsinerisigut: Nunarsuarput ukioq 2025 qanoq isikkoqassava, nunallu avannarliit killiit nunarsuup immikkoortuani tamaani inissisimanertik ataatsimut kisimiillutilluunniit qanoq pitsaanerpaamik iluaqutiginiarsinnaavaat? Taamatuttaa qoqallisigineqarpoq peqatigitillugu pitsaanerpaamik sunniuteqaqatigiinnissaq anguniarlugu suleqatigeeriaatsit suut pitsaanerpaassanersut nunanut ataasiakkaanut iluaqutissat, unammilligassat ataatsimullu soqutigisat eqqarsaatigalugit. Pissutsit qanoq tamanut iluaqutissanngortinneqarsinnaappat? Nunat peqatasut pingasut aningaasaqarniarneri issittumi periarfissat iluaqutiginiarneqarnerisigut nukittorsarneqarsinnaapput, sunillu periarfissaqarpugut? Killeqanngitsumik niueqatigiiffik siumut aqutissaava? Niuerneq aningaasaqarniarnerlu eqqarsaatigalugit ministerit suleqatigiinnerat? Imaluunniit allanik periarfissaqarpa?

Ataatsimeersuarnermi aallaavigineqarpoq nalunaarusiaq ilanngunneqartoq 2014-imersorlu ”Vestnordens arktiske samarbejde mellem Færøerne, Grønland og Island” – ”Savalimmiut, Kalaallit Nunaata Islandillu akornanni nunat avannarliit killiit issittoq eqqarsaatigalugu suleqatigiinnerat”. Nalunaarusiami pineqartumi suliassaqarfiit assigiinngitsut, soorlu aalisarnerup, angallannerup pilesuinerullu, uuliasiornerup, gasisiornerup aatsitassarsiornerullu, aningaasalersuineq sullissinerillu ilanngullugit, iluini siunissami suleqatigiinnissamut periarfissat tikinneqarput.

Siunnersuisoqatigiiffiup aalajangersimasumik qulequtaqartitsilluni ataatsimeersuartitsinermi ilaatigut paasivaa Kalaallit Nunaata Hoyvikimi isumaqatigiissut taamatut isikkoqartillugu ilannguffigissallugu kissaatiginngikkaa. Kalaallit Nunaata kissaatigineruaa Islandimut Savalimmiunullu immikkut isumaqatigiissuteqartarsinnaaneq imaluunniit Nunat Avannarliit Killiit ataanni nunat pineqartut pingasuk akoranni killeqanngitsumik niueqatigiissinnaanermik nutaarlunnarmik isumaqatigiissuteqartoqarnissaa.

Siunnersuisoqatigiiffiup taamatuttaa inerniliuppaa nunat ataatsimut soqutigisaasa kiisalu suliassaqarfiit massakkorpiaq suleqatigiissutigineqarsinnaanngitsut sukumiinerusumik nalunaarsorneqarnissaat pisariaqartoq. Naggasiullugu siunnersuisoqatigiiffiup kissaatigaa nunat pingasut killeqanngitsumik niueqatigiinnissamut isumaqatigiissuteqassagaluarpata nunallu avannarliit killiit niuernikkut siunnersuisoqatigiiffiannik pilersitsinikkut ataatsimut pissarsiarineqarsinnaasut suusinnaanersut nalunaarsorneqassasut.

Nunat Avannarliit Killiit Siunnersuisoqatigiiffiata 2014-imi Vestmannap qeqertaani ukiumoortumik ataatsimiinnermini aalajangerpaa ataatsimut ataatsimiititaliamik pilersitsiniarluni siulittaasoqarfimmit taamatullu aamma nunanit aallartitanit tamanit ataatsimik ilaasortaqaqartumik. Ataatsimut ataatsimiititaliaq 2015-imi marloriarluni naapippoq suliassaralugu suussusersissallugit nalunaarsussallugillu suliassaqaqarfinni suni nunat ataatsimut

soqutigisaqarnersut nunat akornanni suleqatigiinnermut nukittorsaataasinnaasunik. Ataatsimiititaliap sulinerata inernerera allakkiami ilanngunneqartumi "Issittumi nunat avannarliit killiit suleqatigiinnerannik siumut isigisumik Nunat Avannarliit Killiit Siunnersuisoqatigiifiata naliliinera"-ni 2015-imi aggustimi Runavikimi ukiumoortumnik ataatsimiinnermi akuersissutigineqartumi atuarneqarsinnaavoq. Nalunaarusiaq tunngavissiisinnaavoq suliassaqaqfinni nunat ataatsimut soqutigisaqarfiini nunat avannarliit killiit ataatsimut issittoq eqqarsaatigalugu iloriusissiassaannut isumassarsiorfittut. Nunani Avannarlerni Killerne ataatsimut aningaasaqarniarnikkut suleqatigiiffimmik pilersitsisinnaanermut tunngavoq.

**Pisortanut aningaasatigut allaffissornikkullu kingunerisassai**

Missingerneqarpoq piffissami ukiunut marluk ingerlaneranni ukioq naallugu sulisumut 500.000 kr.-inut naapertuuttumik atuisoqassasoq.

**Namminersortunut aningaasatigut allaffissornikkullu kingunerisassai**

Imaaliallaannaanngitsoq. Nalilersuillunili misissueqqissaarnerup inerneru assartuinerup attaveqaqatigiinnerullu iluini pitsanngoriaativinnik malitseqarpata naatsorsuutigineqarpoq tamanna namminersortut aningaasatigut pissarsiaqarfigisinnaassagaat.

**Innuttaasunut aningaasatigut allaffissornikkullu kingunerisassai**

Imaaliallaannaanngitsoq. Nalilersuillunili misissueqqissaarnerup inerneru assartuinerup attaveqaqatigiinnerullu iluini pitsanngoriaativinnik malitseqarpata naatsorsuutigineqarpoq tamanna innuttaasut aningaasatigut pissarsiaqarfigisinnaassagaat.